

“შახტიორი” – “დინამო” (თბილისი)

დონეცკი. “ლოკომოტივის” სტადიონი. 26 აგვისტო.

“შახტიორი” (დონეცკი) – “დინამო” (თბილისი) 1:1 (0:1).

“შახტიორი”: დეგტიარევი, იარემჩენკო, გორბუნოვი, კონდრატოვი, პიანიხი, სოკოლოვსკი, ლატიში, რეზნიკი (ფედორენკო), რუდაკოვი (შაფოროსტოვი), დუდინსკი, საფონოვი.

“დინამო”: გოგია, კოსტავა (ხიზანიშვილი), კანთელაძე, ხინჩაგაშვილი, გ. მაჩაიძე, დარასელია, მ. მაჩაიძე, ქორიძე, გუცაევი, ყიფიანი, შენგელია (ჩივაძე).

მსაჯი: ვ. ლიპატოვი (მოსკოვი).

გოლები გაიტანეს ვ. ქორიძემ (მე-2 წუთი) და ლატიშმა (56-ე წ.).

დუბლიორები 0:0.

მატჩამდე

დილის 9 საათზე დინამოელები მთელი შემადგენლობით “ლოკომოტივის” სტადიონზე იყვნენ. წაივარჯიშეს და სასტუმროში დაბრუნდნენ. თბილისელთა მეტოქე სადამომდე არ გამოჩენილა ქალაქში – “შახტიორი” დონეცკიდან 20 კილომეტრზე, საკუთარ ბაზა კირშია ემზადებოდა მატჩისთვის.

უამრავი გულშემატკივარი ჩამოსულა საქართველოდან. ნაწილი სასტუმრო “შახტიორის” წინ ტრიალებს, ნაწილი – სტადიონთან ეძებს “ზედმეტ ბილეთს”. ბილეთები კი კარგა ხანია გაყიდულია.

...დადესტნელი მიხეილ ალიევი, ერთ-ერთი შახტის მთავარი ტექნოლოგი, 29 წელია დონეცკში ცხოვრობს. 43 წლისაა, ყოფილი სპორტსმენია, თავისუფალს ჭიდაობდა. ამ ათიოდე წლის წინათ უკრაინის პირველობაზე მეორე ადგილიც გაუკავებია.

იმ სახელგანთქმული ალიევის ხომ არაფერი ხართ-მეთქი, სხვათა შორის ვეკითხები. ბიძაშვილი გამოდგა.

მიხეილი დილიდანვე სასტუმროს წინ ტრიალებდა. რა თქმა უნდა, დაესწრება მატჩს, არა, რის დამარცხება, “დინამო” ორს თუ არა, ერთ ქულას მაინც აიღებს.

– როგორ ფიქრობთ, ვინ გახდება ჩემპიონი?

– რასაკვირველია, თბილისის “დინამო”...

მსაჯებმა ნეიტრალური პოზიცია დაიკავეს – ჩუმად, უხმაუროდ მოეწყვენ სასტუმრო “უკრაინაში”.

მორიგემ “საიდუმლო” გამანდო და, წუთის შემდეგ საერთაშორისო კატეგორიის არბიტრს ვალენტინ ლიპატოვს ვესაუბრებოდი. თქმა არ უნდა, პირველი კითხვა უშუალოდ მატჩს ეხება.

– რთული მატჩია, გუნდებისთვისაც და სამსაჯოდაც. შახტიორმა” სულ ახლახან წააგო თასი და საკუთარი მაყურებლის წინაშე რეაბილიტაციას შეეცდება. გულშემატკივრები ფეხბურთელებისგან განსაკუთრებულ საჩუქარს ელიან – ხვალ ხომ მეშახტის დღეა.

– ფეხბურთი ასე უცბათ არ იცვლება, მაგრამ წლევიანდელი ჩემპიონატი ალბათ მაინც გამორჩეულია.

– “შახტიორისა” და კიევის “დინამოს” ორი მატჩი ვიმსაჯე, ერთი აქ, ჩემპიონატის მეორე წრისა, ერთიც – თასის ფინალი. დონეცკში “შახტიორმა” აშკარად დაჩაგრა “დინამო”. მოსკოვში კი მთელი მატჩი კიეველთა კარნახით მიმდინარეობდა. მატჩი თბილისში – “დნეპრი”-“დინამო” თბილისელებმა საკმაოდ უხეიროდ

ითამაშეს. შედეგი შიძლებოდა სულ სხვაგვარიც ყოფილიყო. “დნეპრმა”, პირიქით, ისეთი თამაში აჩვენა, რომ არა და არ ჰგავდა აუტსაიდერს. სამაგიეროდ, ბევრ სხვა, თუნდაც მოსკოვურ მატჩებში ძალზე უსუსურად გამოიყურებოდა. ეს მაგალითები ერთი რამისთვის მოვიხმე: ამგვარი არასტაბილური თამაში დამახასიათებელია წლევეანდელი ჩემპიონატისთვის. რატომღაც იკლო მაყურებელმაც – თბილისსა და დონეცკს არ ვგულისხმობ – შეიძლება ეს მსოფლიო ჩემპიონატის ბრალიც იყოს, მაგრამ დანამდვილებით რაიმეს თქმა ძნელია. ერთი კი არის, წლეულს უფრო აგრესიულად თამაშობენ გუნდები, იმატა გოლებმაც. კითხვა ალბათ მსაჯობის ხარისხსაც ეხება. წლეულს ფეხბურთის სამმართველომ ბევრი გააკეთა იმისთვის, რომ მწვრთნელებს, მსაჯებსა და კოლექტივებს შორის, ასე ვთქვათ, სპორტული ატმოსფერო დამყარებულიყო. ამან მატჩები შედარებით იოლად სამსაჯო გახადა, ბუნებრივია, იკლო შეცდომებმაც.

– ჩემპიონატში თითოეულ კოლექტივს ყოველთვის აქვს ძნელი მატჩი, ჰყავს ტრადიციულად “უხერხული” მეტოქე. ეს ალბათ არბიტრზეც ვრცელდება.

– ძნელი? არ ვიცი, ჩემთვის ყველა მატჩი ძნელია, უფრო სწორად ყველაზე ძნელი მომავალი მატჩია, ის, რომელიც კარზე მოგვადგება.

– ზოგიერთ გუნდთან თქვენგან დამოუკიდებელი მიზეზების გამო ხშირად გიხდებათ შეხვედრა. კარგია ეს თუ ცუდი?

– მატჩს თბილისის “დინამოს” მონაწილეობით წლეულს მეოთხედ ვმსაჯობ. მეხუთედაც მომიწევს – თბილისში “არარატთან”. ხუთჯერ ვიმსაჯე “ზარიასთან”. უნდა გითხრათ, რომ ასეთი ხშირი შეხვედრები არ არის გამართლებული და არც მაინცდამაინც სასიამოვნოა. ვოროშილოვგრადის “ზარიაში” ჩემი მსაჯობისას ოთხი შეხვედრა წააგო. მეხუთე მატჩზე რომ გავდიოდი, ფეხბურთელები რაღაც ცერად მილიმოდნენ. მინდოდა მეთქვა, ჩემი ბრალი არ არის ბიჭებო–მეთქი, მაგრამ...

– საუბრისთვის მადლობა გადავუხადე ვალენტინ ლიპატოვს, მშვიდობიანი მსაჯობა ვუსურვე.

სამივე არბიტრი დასასვენებლად ემზადება. რამდენიმე საათის შემდეგ მატჩია.

მატჩი

მე–2 წუთზე დეგტიარევი აპირებდა ხელით გაეგორებინა ბურთი თავის მცველისთვის, მაგრამ “გადაცემა” უმისამართო გამოდგა, ბურთი მიუვიდა ქორიძეს, ზუსტი დარტყმა და... “შახტირომა” ცენტრიდან დაიწყო თამაში.

ამ გოლმა განსაზღვრა კიდეც მატჩის ხასიათი. მასპინძლები უამისოდაც საკმაოდ აგრესიულად იყვნენ განწყობილი, გაუთვალისწინებელმა მარცხმა კი ცეცხლზე ნავთი დაასხა. მართალია, ერთხანს “შახტიორი” ამ შეცდომის გავლენის ქვეშ იმყოფებოდა, მაგრამ მერე და მერე გონს მოეგო და იერიშზეც გადავიდა, თუმცა სანამ თბილისელთა საჯარიმოს ალყა დაიწყებოდა, “დინამომ” კიდეც ერთხელ საკმაოდ სახიფათოდ უჩხვლიტა მეტოქეს – ყიფიანმა შესანიშნავად დაარტყა მარცხენა ფლანგიდან, ბურთი კი ოდნავ ასცდა დონეცკელთა კარს.

“შახტიორი” ჩვეული მანერით თამაშობს – ბურთი ხან ერთ, ხან მეორე ფლანგზე ინაცვლებს. აქედან კი “დინამოს” საჯარიმოში ეშვება. მართალია, საგოლე სიტუაციები არ ჩანს, მაგრამ მასპინძელთა “დაწოლა” სულ უფრო სახიფათო ხდება. ერთი ხინჯი მაინც სდევს დინამოელთა მოქმედებას – “შახტიორის” რიგებში ამ დღეს არ თამაშობს ტრავმირებული სტარუხინი. ისეთიც არავინ გამოჩნდა, რომ იერიშებს სათანადო გაგრძელება მოუძებნოს – თბილისელი სტოპერები “საჰაერო ბრძოლაში” აშკარად სჯობნიან მეტოქეებს.

მე-15 წუთი. ზედიზედ 3 კუთხური “დინამოს” კართან. სურათი არ იცვლება, ისევ თბილისელი მცველები იმარჯვებენ და “შახტიორიც” სხვა გზებს ეძებს, ვინაიდან, ასეთი ერთფეროვანი იერიშით არაფერი გამოვა. მასპინძლებს ახლა უშუალოდ ცენტრიდან შეუტყეს. შორიდან ძლიერი დარტყმით გოგიას სიფხიზლეს ამოწმებს ლატიში.

მახსენდება მატჩისწინა საუბარი ზ. კუტივაძესთან. “შახტიორი” ფლანგებიდან შეეცდება ბურთის საჯარიმო დაკიდებას, სტარუხინი კი განსაკუთრებით თავს სწორედ ამგვარ სიტუაციებში გრძნობს კარგად. (ჯერ კიდევ არ იყო ცნობილი, რომ სტარუხინი მინდორზე ვერ გამოვიდოდა). ბუნებრივია, მატჩის დაწყებისთანავე შეგვიტყვედნენ. შევეცდებით ტემპი შევანელოთ, დიდხანს გავაჩეროთ ბურთი”.

“დინამო” კარგა ხანს ათამაშებს ბურთს. იკლო ტემპმა. პირველ 30 წუთში მასპინძლებმა სულ რამდენჯერმე დაარტყეს გოგიას კარისკენ – ორჯერ ლატიშმა, ერთხელ დუდინსკიმ.

თამაში იმ კალაპოტში ჩადგა, რომელიც თბილისელებს სურდათ და ისინიც, ცოტა არ იყოს, გამშვიდდნენ. მასპინძლებმა, ბუნებრივია, დაუყოვნებლივ ისარგებლეს ამით – ტაიმის ბოლო 15 წუთი ბურთი კვიმატად დაგორდა სტუმართა საჯარიმოში.

მეორე ტაიმის დასაწყისში გორბუნოვის შეცდომა კინაღამ მეორე გოლად დაუჯდათ დონბასელებს. გუცაევი სწრაფად გაექცა მცველებს, კარისკენ ჩააწოდა და... დეგტიარევის თავგანწირული ნახტომი რომ არა, გოლის ავტორი შახტიორის ცენტრალური მცველი გორბუნოვი გახდებოდა.

5 წუთის შემდეგ მასპინძლებმა გაითამაშეს სწრაფი კომბინაცია, ლატიშმა ამჯერად ზუსტად დაარტყა. ბურთი, რომ იტყვიან, აუღებელი იყო და ანგარიშიც გათანაბრდა – 1:1.

ამის შემდეგ შენგელიას, დარასელიასა და გუცაევს მიეცათ რამდენიმე ხელსაყრელი შესაძლებლობა, ერთხანს “შახტიორიც” ცდილობდა დაწინაურებას. მერე კი მეტოქეებმა ფრთხილი ტაქტიკა აირჩიეს და თამაშმა მინდვრის შუაგულში გადაინაცვლა. ჩემპიონობის ორმა ყველაზე რეალურმა კანდიდატმა თანაბრად გაინაწილა ქულები.

მატჩის შემდეგ

ვ. სალკოვი. “შახტიორის” უფროსი მწვრთნელი. “დინამო” ახლა ჩემპიონობის №1 კანდიდატია. გუნდში საკმაოდ არიან მაღალი კლასის ფეხბურთელები და, საერთოდ, დღეს ამ კოლექტივს ყველანაირი ამოცანის გადაწყვეტა შეუძლია. იგი მონოლითურია და წონასწორობიდანაც ვერ გამოიყვან, როგორც ეს ადრე არაერთხელ ხდებოდა. დღევანდელ მატჩში, ბუნებრივია, გვექონდა ჩვენი გეგმები, მაგრამ... ჯერ იყო და დეგტიარევი უხეში შეცდომა, მერე, თბილისელები, მართალია, მეტწილად თავს იცავდნენ, მაგრამ არც აქედან გამოდნა რამე, პირიქით, “დინამოს” შეტევები ბევრად სახიფათო იყო. “შახტიორმა” მართალია, გაიტანა გოლი, სხვა უკეთესი შესაძლებლობა კი ფაქტიურად, არც გვექონდა. ჩვენი გულშემატკივარი უეჭველ გამარჯვებას ითხოვდა. ერთია სურვილი, მაგრამ კლასი მაინც თავისას შვრება”.

მსაჯთა ოთახთან ლიპატოვს მოვკარი თვალი.

– როგორ არის საქმე?

– არა უშავს რა. – მიპასუხა და მთელი დღის განმავლობაში ალბათ პირველად გაიღიმა.

– შემდეგი მატჩი?

- ერევანში.
- ალბათ, ყველაზე ძნელი.
- რა თქმა უნდა...

გასახდელში ახალი ამბები მოიტანეს. კიევის “დინამომ” კვლავ გაიმარჯვა, სხვაობა 8 ქულაა, მოსკოვის “დინამოსთან” +7 (თამაში მარაგში), “შახტიორთან” +4 (აქაც ერთი თამაშით ნაკლები აქვს მეტოქეს), “ნეფთჩიმ” გამანადგურებელი ანგარიშით – 1:5 წააგო “ფახთაქორთნ”. შემდეგი მატჩი კი ბაქოშია... რაღა თქმა უნდა, ძნელი.

ი. ბერიაშვილი (ჩვენი სპეც. კორ.).